

Meninjau ke Alam Akhirat:

Soal Orang Mukmin Melihat Tuhan

Perselisihan Ulama Tentang Kaum Perempuan

Telah Melihat Tuhan Pada Hari Akhirat

Di antara soal-soal yang berkaitan dengan iman hari akhirat ialah: Soal orang-orang mukmin melihat Tuhan pada hari akhirat.

Menurut pendapat ahli hadith, bahawa: Orang-orang mukmin akan melihat Tuhannya pada hari akhirat dengan mata kepala mereka dan Tuhan berkata-kata dengan mereka pada hari itu.

Dalam kitab “*Hādī al-’Arwāḥ*” ada tersebut bahawa: Tuhan itu dilihat tetapi tidak didapati (*lā yudrak*), sebagaimana Tuhan itu diketahui dan tidak diliputinya. Inilah yang difahami oleh sahabat-sahabat dari firman Allah ertinya:

Tuhan tidak didapati oleh mata, oleh pemandangan, dan dia mendapati segala yang dipandang (23, *al-An‘ām*).

Jadi, orang mukmin dapat melihat Tuhan pada hari akhirat dengan mata kepada mereka, tetapi penglihatan mereka itu tidak dapat meliputinya. Demikian juga orang mukmin dapat mendengar perkataan (*kalām*) Tuhan, tetapi mereka tidak dapat meliputinya. (al-Safārīnī 2: 236-238).

Perselisihan ulama tentang kaum perempuan melihat Tuhan pada hari akhirat.

Mengenai soal perempuan melihat Tuhan pada hari

akhirat, segolongan dari ulama, di antaranya al-Hāfiz

‘Imād al-Dīn ‘Ibn Kathīr berpendapat, bahawa: Orang perempuan juga akan melihat Tuhannya pada hari akhirat, iaitu pada hari raya *fiṭrah* dan hari raya *adḥa* dan tidak melihat Tuhan pada hari raya Jumaat. Pendapat Ibn Kathīr ini didasarkan kepada zahir hadith al-Dār Qaṭnī. Dengan hadith ini pula al-Hāfiz al-Suyūṭī menjazamkan hal itu. Tetapi al-Hāfiz al-Suyūṭī mengecualikan isteri-isteri Nabi-Nabi dan anak-anak perempuan mereka, bahawa mereka ini semua melihat Tuhan mereka, pada hari raya dan hari-hari yang lain.

Jelasnya, melihat Tuhan pada *mawqif* diperoleh oleh Nabi-Nabi dan Rasul-Rasul dari segala umat dan oleh orang-orang mukmin lelaki dari umat ini (Islam). Mengenai orang selain dari umat ini diperselisihinya.

Pendapat yang diperkuatkan oleh al-Safārīnī, ialah bahawa malaikat dan mukmin-mukmin dari jin melihat Tuhan *dimawqif* berserta orang-orang mukmin yang lain. Dalam syurga orang-orang mukmin ini pun melihat juga Tuhan pada sehingga waktu.

Al-Hāfiz ‘Ibn Rajab telah menjazamkan dalam kitabnya “*al-Laṭā‘if*” bahawa tiap-tiap hari raya bagi orang-orang mukmin di dunia ini sesungguhnya adalah hari raya bagi mereka di dalam syurga, mereka berkumpul untuk menziarahi Tuhan, pada waktu itu tampaklah kepada mereka Tuhan sehingga mereka dapat melihatnya.

Golongan mu'tazilah tidak membenarkan adanya *ru'yat* dan *menta'wilkan* segala hadith-hadith *ru'yat* itu (al-Safārīnī 2: 237-245).

Pengertian ulama dalam memaknakan ayat:

“*Lā tudrikuhu al-absāru wa huwa yudriku al-absāra wa huwa al-laṭīfu al-khabīru*” (tidak dapat dilihat oleh segala penglihatan dan Dialah Yang Melihat segala penglihatan, dan dialah Yang Maha Halus dan Maha Mengetahui) 103, *al-'An'ām*.

Kata jumhur: Yang ditidakkkan di sini ialah “*ru'yat Ihātah*” (pemandangan yang meliputi - P) yang dengannya dapat diketahui hakikat Tuhan, bukan semata-mata *ru'yat*. Inilah pendapat yang terkuat dalam menghimpunkan ayat dengan hadith yang sahih yang menetapkan bahawa orang-orang yang mukmin melihat Tuhan di akhirat. Golongan yang membenarkan faham mu'tazilah yang menidakkkan *ru'yat* kerana mengertikan “*idrāk*” dengan *ru'yat* mata kepala, menetapkan bahawa yang dinafikan di sini tertentu dengan keadaan dunia dan mereka berkata: bahawa 'Ā'ishah menetapkan ada *ru'yat* di akhirat. Adapun yang ditidakkkan oleh 'Ā'ishah ialah *ru'yat* di dunia, walaupun oleh Nabi sendiri.

Menetapkan *ru'yat* dalam negeri akhirat yang berlainan dari negeri dunia dalam segala urusan dengan cara *tanzīh* dari menyerupakan Tuhan dengan hamba-Nya, bukanlah dari antara hal-hal yang mustahil. Tak ada dalam al-Qur'ān ayat-ayat yang *qaṭ'īyy dilalahnya* dalam menegakkan *ru'yat* dan dalam menidakkkannya.

Ada hadith sahih yang tegas menetapkan *ru'yat*, tetapi apakah yang dimaksudkan dengan *ru'yat*, tidak *qaṭ'īyy* disamping itu ada pula hadith yang tegas-tegas menidakkkan *ru'yat*.

Ahli-ahli hadith dan alim ulama dari mazhab Hanbali menyerahkan maksud dari hadith-hadith *ru'yat* itu kepada Allah sendiri. Mereka tidak *menta'wilkan* dan tidak *mentashbihkan*.

Kesimpulannya

Ru'yat bukan dari dasar iman yang *qaṭ'īyy*. Dalam pada itu, umat sejahteralah kita berpegang kepada zahirnya dengan tidak *menta'wilkan*, iaitu menetapkan adanya *ru'yat* “*bilā kayfa*” (melihat dengan tidak mengetahui kaifiyatnya). (Soal itu telah dibahaskan oleh al-Sayyid Rashīd Riḍā dalam *al-Manār* 9: 128).

Kata al-Sayyid Rashīd:

Mengenai Nabi melihat Tuhan pada malam *mi'rāj* ada yang menetapkan dengan mata hati, ada yang menetapkan dengan mata kepala, sebagaimana ada yang menidakkkannya. Ibn 'Abbās menetapkan 'Ā'ishah menidakkkan. Riwayat yang diterima dari 'Ā'ishah terang tegasnya. Ibn Mas'ūd dan Abū Hurayrah juga menidakkkannya. *Dinaqalkan* oleh al-Dārimī akan *ijmā'* sahabat atas demikian yakni menidakkkannya. (al-Minār 9: 147).

Kesimpulannya, riwayat Ibn 'Abbās yang menetapkan adanya *ru'yat*, sebenarnya suatu *istinbāt* daripadanya, bukan suatu hadith *ma'arūf*. Ringkasnya riwayat Ibn 'Abbās, *marjū'* secara riwayat dan *marjū'* secara *dirāyat*. Pendapat yang benar dalam hal ini ialah pendapat 'Ā'ishah. Kerana pendapat 'Ā'ishah itu bukan semata-mata pendapatnya seperti yang didakwakan oleh sebahagian ulama, hanya pendapat yang diperoleh dari Rasul. Terang tegas dalam satu riwayat 'Ā'ishah berkata: “Sayalah permulaan orang yang bertanya kepada Rasul (S.A.W) tentang makna ayat: “*Lā tudrikuhu al-absār*”.